

平定粵寇紀略

一
函
十
三
冊
函

平定粵寇紀畧卷三

咸豐四年甲寅正月北軍攻克獨流賊巢

三年十一月我軍攻靜海縣受挫勝大臣與僧王
合兵建以圍爲攻之策始復靜海惟獨流窮賊固
壘抗拒奉

嚴旨飭催以期速清畿甸於是將帥親冒矢石於四年
正月初八日大破獨流賊巢餘賊由靜海分竄占
踞束城陳官桃園社九等邨莊僧王勝大臣督各
軍追擊之

湖北軍覆於黃州府總督吳文鎔死之

湖北賊麇聚黃州府張署總督亮基調撫山東吳
總督抵任奉

旨出省督師與崇巡撫綸議軍務意不愜崇巡撫奏劾
之遂倉卒率兵以行三年十二月赴黃州駐堵城
距郡二十里本年正月初十日諜知賊黨大張鐙
火飲酒觀劇吳總督以爲有懈可擊親督兵勇進
勦三戰斃賊數百名連日大雪諸軍凍餒有死者
賊衆繞道出大營後林麓岡巒設伏幾徧而營中

竟未之知也十五日全股悍賊自府城驟至連營
火起兵勇大潰吳總督立時殉難二品頂戴按察
使唐樹義督率水勇礮船退赴金口收集潰卒圖
再舉而賊已尾追陷漢陽直上沿江皆賊艇疊次
襲擊竝沈其十餘船因賊衆蟻集樹義坐船被擊
沈墜水身死有家丁王貴懷印竄伏鄰近乞食設
法出溺骸爲殯殮貴因傷重旋死

二月揚州軍追勦瓜州賊總兵瞿騰龍陣亡

總兵瞿騰龍帶兵由瓜州西岸進勦屢報克捷賊

傾巢出鬪初五日官兵兩岸魚貫進左翼德興阿
右翼鞠殿華縱兵衝突賊紛潰殲斃三百餘名騰
龍下馬持刀步戰殺賊數十名以深入遇害

金陵賊分股陷安徽太平府學政孫銘恩殉難

金陵賊遣僞將軍孫寅三等由太平後路竄祁門
縣復繞而南是月陷太平府學政孫銘恩已因請
終養獲咎未受代賊至遂遇害賊踞太平爲老巢
結壘三十餘座直達江干與金陵之衆往來不絕
僧王殲賊於阜城縣外賊退入城

賊自束城等處竄踞阜城縣分占附近各邨莊二月十五日僧王相度地勢派副都統郭什訥達洪阿副將史榮椿侍衛達崇阿等分攻堆邨連邨林家場等三邨莊用草束火藥燃燒房屋冒火撲入躍牆登屋愈殺愈進統計殲斃僞指揮監軍總制師帥旅帥卒長兩司馬等一百餘名衆賊三千餘名擒獲老賊三百餘名斬首四百餘級燒斃及自盡者不計其數餘賊敗入城

岳州復陷官兵擊賊湘陰縣

楊秀清欲通楚粵之路遣賊黨石祥貞會漢黃各賊舍武昌而趨長沙溯江直上二月初一日陷岳州分擾靖江橋口等處竄入湘陰城駱巡撫派升用同知直隸州王鑫統帶練勇竝飛咨曾侍郎派其季弟文生曾國葆候選同知趙煥聯武陵縣訓導儲玫躬在湘陰縣之杉東橋新康一帶殺賊數百名焚賊船十餘隻儲玫躬聞賊分擾甯鄉商同趙煥聯馳往衝殺進城賊始下竄其靖江橋口賊船亦迎擊獲勝

三月皖賊竄擾山東金鄉縣臨清州

河北賊勢窮蹙惟屯紮各鄉邨拚死固拒計剋期可擒乃金陵首賊密令安徽賊衆由豐工闕口偷渡黃河竄擾山東冀分兵勢以杼阜城之困直犯金鄉縣陷之知縣楊鄭白全家殉難復進撲臨清州城僧王派將軍善祿等分兵迎勦三月十二日勝大臣亦奉

命督兵至臨清數戰皆捷殺賊千三百餘得首二百餘級生擒五十名三月十五日賊用地雷轟陷西南

正南城牆數十丈漲燄灼天蠡擁入城官兵因北
門不啓不得入遂致失守升用知府臨清州知州
張積功臨清協副將德慶署副將慶順參將吉興
游擊阿克東阿王用安都司武殿魁希奎千總馬
誥均陣亡賊之初入東境也巡撫張亮基分遣將
弁堵禦因奏報失實革職遣戍以崇恩爲山東巡
撫至是與勝大臣善提督祿均奉

旨革職戴罪自効

湖北德安諸郡縣陷於賊

自吳總督殉難賊黨進踞漢陽遣賊目上陷岳州
武漢上游援師以絕賊由襄河進陷德安府及隨
州棗陽縣署總督台將軍湧督師遠駐隨州武昌
之門不啓學使青侍郎麟自德安晉省與崇巡撫
綸會籌防堵崇巡撫聞計丁憂青侍郎接巡撫任
惟統標兵千餘人固守而已湖北諸城殘破不可
勝數施南鄖陽以山僻免害形勢之地惟荆襄存
河北軍克復臨清州城

賊陷臨清後堅伏不出我兵疊次轟擊三月二十

五日三面猛攻盡埽城外賊壘二十六日丑刻踴躍登城斃賊多名州城克復賊向南奔

四月勦臨清逸出餘賊殄除淨盡

賊自臨清竄冠縣鄆城均受創復占踞曹縣築木城以自固四月初九日勝大臣督兵至連破賊巢勢窮出竄爲伏兵邀擊追至漫口支河逼賊入水前踞揚州之僞丞相曾立昌竝悍酋許宗揚均策馬渡河溺斃僞副丞相陳世保先於冠縣燒死全股賊黨悉數殄除無漏網者東境以清

僧王攻克阜城縣賊陷連鎮

阜城賊自勝大臣分兵臨清後僧王屢次攻殺斃賊已衆四月初九日夜全股南竄僧王督馬隊追勦殄獲多名賊竄連州占踞連鎮我兵四路圍攻勝大臣亦自曹縣移得勝之兵赴鎮合勦楚南水師大捷於湘潭焚賊舟殆盡

賊由長江上踞岳州溯流至銅官渚逼近長沙賊船屯泊靖港四月初二日曾侍郎督戰船四十隻陸勇八百人邀擊之西南風發水流迅急船不能

泊爲賊所乘各勇潰散時賊已由間道暗襲湘潭
縣城徧擄商船將汴湘江通兩粵長沙危在旦夕
曾侍郎飭水師楊岳斌彭玉麟等往援分隊開礮
攻勦並用火箭焚燒賊船彭玉麟等伏坐小船往
來督戰三日之間燬賊船六七百隻斃賊千餘名
賊退入湘潭城

塔參將克復湘潭縣

湖南撫標守備塔齊布由都司揀發到湘性果毅
耐勞苦曾侍郎一見識爲將才特薦之擢署撫標

參將使與守備周鳳山督陸軍攻湘潭三月二十八日於槍礮如雨中逼入賊營縱火焚燒殺賊五百餘名生擒二十餘名燒斃無數二十九日賊兩次出撲塔齊布等縱橫血戰立斬僞帥先鋒九名殺賊千餘名追至嶺下水邊逼溺極衆四月初二日破其城外木城斃老賊數百人適水師亦大捷初三日賊竄回城訓導江忠淑設伏城隅開城接應塔齊布揮軍直入將城賊盡數搜殺立復縣城綜計水陸斃賊不下萬人解散之衆亦以萬計餘

賊遁西湖自粵賊稱亂以來至此始受大創官兵亦知自奮人人有殺賊之心全楚軍氣爲之大振湖北荊州官軍敗賊於龍會橋

長江爲羣賊往來道荊州當四路之衝至省道梗一應軍務

特詔荊州將軍今

封一等伯爵

欽差大臣文華殿大學士湖廣總督官文統之隨州棗陽之賊於三月二十八日陷安陸府四月初六日

陷荊門州竝句結監利石首二縣土賊窺伺荊州
是時滿綠各營官兵強半出防要隘守城僅二千
人而駐紮巴東利川之四川松潘建昌二鎮漢屯
官兵奉

勅調未至有雲南普洱營游擊王國才署龍陵營參將
佟攀梅爲湖廣吳總督檄調以道阻不得赴省行
次荊州官將軍一見偉其畧奏留差委適賊至遣
王國才等督帶官兵一千二百餘名配帶江陵練
勇五百人爲先驅分扼龍會橋了角驛等處四月

十三日賊衆直撲龍會橋新練之勇皆閒散游民見賊色動國才拔劍奮身曰今賊如濤湧不圖猛進何處求生活遂督親兵數十人挺矛入賊隊斬其愍大呼後陣兵勇曰退一步者斬佐領玉貴等促衆直前斃賊甚多賊衆先於橋北民房內設伏王國才派千總畢金科拋擲火彈燒燬民房斃伏賊百餘名賊卽敗退追至馬隍山復爲副都統貴陞率協領功額訥等從樂壤橋板橋二處堵截佐領貴鳳等帶兵接應三路合隊槍礮齊施殺賊千